

Alti Klatsch-Clique 1929

Comité-Schnitzelbank

Rot - Blau



(nach dr alte Melodie)

Isch das nit e Kunstusstellig?
's Resultat isch nit grad gfellig.
Stai-Came-Sulz-Stock-houf-Hind
Hän rot-blaui Kinstlergrind!
Rot isch d'Liebi — blau isch d'Treui
Kurz isch dr Wahn — und lang isch d'Reui!

Isch das nit e grosse Bräschte?
Jo, das isch e grosse Bräschte.
Liecht-Reklame-Kino-Käschte.
Liecht-Reklame-Kino-Käschte.
's Publikum wird animiert
Und e grosse Saich serviert.
I weiss misex no gar nit worum
Mir bi uns mien ha-n-e Forum!

Isch das nit e-n-Eichekranz?
Jo, das isch e-n-Eichekranz.
Mit em vaterländische Glanz.
Mit em vaterländische Glanz.
Wo d'Turner-Sänger heim sin koh.
Hän si der Lampe hängge loh!
Wenn das so witer goht isch bald
d'Santihanns e-n-Eichewald!

Tuets im mindere Basel brenne?
Nai — es isch e Velorenne.
Die ganzi Stadt tuet wie verruggt.
Im Trämli wird me fascht verdruggt.
D'Ytrittspris sin nit grad b'scheide.
's kennt aim der ganzi Goüt verleide.
O Muba-Merkur arme Ma
Statt Flügel muesch e Velo ha!

Zahlt dä Ma au sini Styre?
Nai — er zahlt nit sini Styre.
D'Schnizge tuet em undere fyre.
D'Schnizge tuet em undere fyre.
Gäll klaine Nationalmax Zragi
Das isch e kaibe schlächti Gnagi!
Dr Camille zahlt si Hampelma
Nur wenn er het e Nutze dra!

Stickelberg-Emanuel
De bisch e grossi Dichterseele.
De machsch in Reformation
Als Seele-Silo-Reaktion.
E Bsuech in Doorn, er wurd sich lohne
Bim Schnöre-Willi ohni Krone.
Villicht wurd dä di animiere
Mit Fyhrwehrmanne z'paradiere.

Isch das nit e dummi Gosche?
Jo, das isch e dummi Gosche!
D'Saffa isch zwor längscht erlosche.
D'Saffa isch zwor längscht erlosche.
Domols het me gmaint die Fraue
Welle-n-is der Staat versaue.
Mieste mir uff die hit loose
Kennt is d'Wält ins Fydle bloose.

D'Fasnacht isch das Jahr im Hornig.
Im Strofg'richt herrscht e nätti Ornig.
's bescht isch, d'Arbet z'yberwinde
Wenn d'Akte-Steess im Rhy verschwinde.
Die guete Grische, d'Polizische
Tien si wieder usemische.
Däm Dubel mit unbrennter Aesche
Sot me rächt der Arsch verwäsche.

B'suechet dr Schluss-Obe vo de Comité-Schnitzelbank am nägste Sunntig z'Obe am siebeni im Musiksaal. d'Billet ka-me scho im Vorverkauf ha.